

## E guddi Nachbarschaft

In uns'rer Gass, ich war noch klään,  
hat` s in meinem Alder nur Buwe genn.  
Unn weil ich doch aach gerre spiele wollt,  
bin ich halt mit denne erum getrollt.  
Was die ohngestellt honn - jeed Dummerei,  
war ich als enzisches Mäde debei.

Es meischt gereizt hat uns Nachbars Gaade.  
Do kunnde mir es kaum erwarde,  
bis es im Herbscht endlich soweit war,  
dass die Obstbääm honn ihr Frucht getrah.  
Donn iwwer de Zaun unn die Bääm enuff!  
Awwer de Nachbar passt hinnerm Finschda uff!

Schwuppdiwupp! Schunn hadda uns vawitscht;  
die Buwe sinn ab - unn ich war gepritscht.  
So schnell mir kunde sinn mir gerennt;  
ich war widda de Dumme - mich hadda gekennt.

Wenn dann mei Babbe om Nachbar is vorbei,  
hat der geruf: "Willem, dei Schdripsel war widda debei!"  
Ich honn mit Herzklobbe hinna de Heck gehuckt,  
honn voll Bammel durch die Äschd geguckt.  
Mir war nit wohl bei der do Sach;  
ich honn gewaad uff de große Krach.

Das wollt ich nit, ich kunnt`s nit honn.  
De Nachbar war schließlich kenn beeser Monn.  
Awwer weil ich meim Babbe sei Herzbläddsche war,  
wird der mich vateidische, das war mir klar.  
Doch was donn mei Babbe hat gesaht!  
Alles onnere - nur das hätt ich nit erwaad.  
Das war fier mich e aarischer Schock.  
"Matz," saada, "hau em de Hinnere unnam Rock.  
De Buwe ziehscht du jo aach ohne Padong  
die Buxe stromm unn die Ohre long.  
Nur so wird das klään Oos endlich kuriert.  
Womeeschlich hat`s die Buwe noch ohngefiehrt."  
Do honn ich mich awwer gonz bedripst  
hinna die Heck geduckt unn vor mich hin geschnipst.  
Jetzt heer ich de Nachbar knochehart lache:  
"Nä, Willem, das däht ich niemols mache.

Awwer enns wääß ich jetzt: Mir zwei krinn nie Krach -  
nit weje de Kinna, nit weje em Hund odda sunschd ääna Sach.  
Mir schwätze mitenonner, wenn e Problem mir honn -  
sachlich, vastennisch, vunn Monn zu Monn.

Unn so is es geblieb bis zum heidische Dah.  
Inzwische bin ich em Nochbarsohn sei Frah.  
Oft, wenn die zwei Obas zesamme sitze,  
mache se iwwa die alt Geschischt Witze.  
Sie äbbele unn uze - warum donn nit!  
Lass ne ihr Spaß, mir lache halt mit.

Die Lehr, die mir aus der Geschischt gezoh:  
Mir makes wie unser Alde - äweso.  
Mit em Nochbar wird geschwätzt, uff e unn frei;  
bis jetzt simma gudd gefahr debei.  
Warum aach streide in jedem Fall -  
es gebbd Streid genuch - in da Welt iwwa-all.

*Helene Keller*